

BERITA HARIAN

Wednesday Sept 8/1004

Bukan UniKL kelas kedua tetapi pemikiran masyarakat

SYABAS kepada Universiti Kuala Lumpur (UniKL) kerana melahirkan graduan sulung mereka. Saya berasa amat bangga kerana anak sulung saya juga mendapat diploma pada hari bersejarah bagi UniKL itu. Tahniah saya ucapan kepada mereka yang bertungkus lumus untuk merealisasikan impian ini.

Untuk melahirkan sesuatu kelainan bukanlah mudah. Saya pernah membaca artikel sesi soal jawab dengan Presiden UniKL, Prof Datuk Seri Dr Ibrahim Saad. Beliau menyatakan impian dan harapan untuk menjadikan UniKL setanding universiti terkemuka di Malaysia dan berharap masyarakat tidak memandang UniKL sebagai universiti kelas dua.

Bagi saya tidak perlu Dr Ibrahim memikirkan tanggapan masyarakat terhadap wawasan UniKL seperti kata Perdana Menteri, Datuk Seri Abdullah Ahmad Badawi pada amanat dalam buku cenderamata konvokesyen yang ringkas dan padat: "Yang susahnya nak ubah sikap manusia."

Mengapa begitu? Saya ingin berkongsi pengalaman saya sendiri. Saya pensyarah di sebuah kolej swasta dan mengajar jurusan Sains Kesetiausahaan. Percaya atau tidak saya ingin katakan pada Dr Ibrahim hingga ke hari ini, masih ada dan banyak beranggapan seorang setiausaha hanya perlu cantik dan pandai membancuh kop.

Yang sedihnya tanggapan ini bu-

kan hanya daripada orang yang tidak berpelajaran tinggi, malah orang yang berjawatan tinggi, ini adalah maklum balas sebahagian pelajar saya.

Apa yang saya ingin nyatakan, jangan sekali-kali kita pedulikan anggapan sesetengah masyarakat dan sebaiknya jangan sesekali disebut kelas kedua kerana ia akan memberi ruang kepada mereka yang tidak peka.

Di belakang saya sendiri pada hari konvokesyen UniKL, ada jemputan yang membandingkan kejayaan anak mereka dari universiti tempatan lain.

Ketika anak saya diterima memasuki Malaysia France Institute (MFI) saya bangga, walaupun ada di kala-

ngan kawan saya mengatakan "mana tempat tu tak biasa dengar pun, bagus ke?"

Yang kecewanya ada di antara mereka adalah guru anak saya ketika belajar dulu. Tetapi bila saya berbual dengan kawan-kawan saya yang bukan Melayu mereka berkata: "Itu adalah institut yang baik". Mereka ini lebih peka dan sedar perlunya bidang kemahiran.

Majlis Amanah Rakyat (Mara) seharusnya megah dan bangga dengan kejayaan universiti ini dan megah terus megah, lebih-lebih lagi dengan pemashyuran Tengku Abdullah sebagai canselornya.

SITI HASANAH SANUSI,
Bentong, Pahang.